

Ք.

Այստեղ իսկապէս պէտք է վերջանար մեր խօսքը. բայց ձեռքի տակ ունինք մի գործ, որ կարծում ենք Իգնատիոսի հետ պիտի կապել, թէեւ հաստատուն կերպով պնդել չենք կարող թէ նորանն է:

Պատերազմի ընթացքում մեր ձեռքով էջմիածին է բերուած և մատենադարանին յանձնուած Ղարաբաղի Մեծչէն գիւղի նըշանաւոր «Կարմիր Աւետարան»ը, որ թըւականով երկրորդ հին ձեռագիրն է Հայոց մէջ, գրուած ՅԾԸ (= 909) թուին «Ի Կոստանդիանոպոլիս ի ձեռն թութակելի ծառայի ծառային Քի. Տն. Աշոտոյ»: Բուն աւետարանը իւր մէկ հատիկ մանրանկարով, բնականաբար, այստեղ մեր քննութեան նիւթ լինել կարող չէ, բայց նորան կցուած է 5 թերթ, § 10 խորաններով, եւ Մատթէոսի ու Ղուկասի սկզբնաւորութիւնների առաջին թերթերով:

Նորոգութեան այս յաւելումը, թէեւ թուական չունի, բայց ցուցումներ ունինք որոշելու նորա ծագման մօտաւոր ժամանակը. խորաններից մէկի (5ա) գերանների վերայ կանաչ դաշտում դեղին գոյնով գրուած է, «Ոհ թաթար, վայ աւուրն որ եկիր, անցուցեր զաշխարհս | Ոհ ներեցեր Ած. անչափ արիւնհեղութիւնս»: Այս խօսքերը կարող են գրուած լինել մօտաւորապէս 1236-1242 թ. թ. կամ քիչ յետոյ, Թաթարների արշաւանքի անմիջական ազդեցութեան տակ՝ նրանց նուաճողական շրջանում. այդ թուականներից յետոյ արդէն հայ իշխանները համակերպուել էին նոր պայմաններին եւ ոչ միայն ենթարկուել Թաթարների իշխանութեան, այլ եւ հաշտութեան պայմանների համաձայն իրենց զօրքերով մասնակից նրանց դէպի Փ. Ա. սիայի խորերը՝ Երզնկա, Սեբաստիա, Կեսարիա կատարած արշաւանքներին⁽¹⁾:

Ժամանակի այսպիսի որոշման միանում է և ուրիշ հանգամանք՝ խորանների նկարչի անունը. Եւսեբիի և Կարպիանոսի թղթակցութեան վերջում, գրուած փոքր երկաթագրով, գրիչն աւելացնում է, 2ա.

«Եւ զԻգնատիոս յօքնամեղ գրիչ յաղաւթ(?) յիշեա ով տր. իմ, եւ դու յիշեալ լիցիս ի տր. ամէն»: Երկրորդ անգամ նկարիչը յիշում է իւր անունը Ճա. խորանի գերանների վերայ (պատկ. 14). «Ած. ողորմեա ստացողի սորա և մեզ», ներքեի գերանի վերայ. «Տր. Ած. ողորմեայ Իգնատիոսի: ամէն», շատ նման Իգնատիոս Հոռոմոսցու խոշոր երկաթագրով գրչութեան: Եւ վերջապէս երրորդ անգամ իրեն յիշում է Ճբ. նկարած խաչի (պատկ. 15) տակ, ներքեի գերանի վերայ. «Սուրբ նշան աւգնեայ մեղաւորիս Իգնատիոսի», ինչպէս Իգնատիոս Հոռոմոսցին Հաւուց թառի աւետարանի խաչի տակ գրել էր «բարեխաւս Իգնատիոսի»:

Սրանց վերայ աւելանում է եւ հետեւալը. աւետարանիս մէջ ունինք միջին, ուղղանկիւն երկաթագրով այսպիսի մի յիշատակարան. «Արդ ես յամենայնի նուաստ տր. Սարգիս ստաց[ա]յ սբ. աւետարանս անջինջ յիշակ(?) ինձ եւ իմ ծնաւդացն որք ընթեւնոյք յիշեցէք ի Բս.»: Ո՞ր կարող է լինել այս տէր Սարգիսը: Կրչութիւնից դատելով ժամանակակից է նա Իգնատիոս նորոգող նկարչին, և որովհետեւ վերեւ տեսանք, որ նա իւր մեկենասին «տր. իմ» է անուանում, անհաւանական չէ, որ հէնց յիշատակարանի տէր Սարգիսը լինի աւետարանի նորոգել տուողն ու երկրորդ ստացողը: Ա՛րդ, մեր Հոռոմոսցի Իգնատիոսին եւս ժամանակակից է Անիի արքեպիսկոպոսներից Տէր Սարգիս, որի անուան յիշատակութիւնն ունինք ՋԺԱ (= 1262) թուին Բագնայրի արձանագրութիւնների մէջ, իսկ Այիշան մեղ անյայտ աղբւրների հիման վերայ նորա ժամանակը նշանակում է 1245-1276 թ.: Այս բոլորը զարթեցնում են մեր մէջ երկու Իգնատիոսների նոյնութեան միտքը:

Բայց նոյնացման մտքի դէմ կայ լուրջ դժուարութիւն եւս, որ երկու արուեստների տարբերութիւնն է: Սակայն այդ տարբերութիւնը կարող է մասամբ օրինակի ազդեցութեան հետեւանք լինել, որ անպայման հին է, երկրաչափականով արաբական և թռչունների ձեւակերպութեամբ սասանեան յետին աւանդների հետ կապուած, եւ մասամբ, գուցէ, այդ պարզ, գլխաւորապէս կիւնեվարիումով զծագրուած,

(1) Գանձակեցի՝ Ղուկ. հրատ. 264 | 5 — 269; Տես եւ մեր Խաղբակեանք եւայլն, եր. 19, ծանօթութիւն: